


# Siaran Media: Institusi Keagamaan Kekal Menikmati Pengecualian Cukai

 Rabu, Jan 11 2017



## Siaran Media Kementerian Kewangan Malaysia

### “INSTITUSI KEAGAMAAN KEKAL MENIKMATI PENGECUALIAN CUKAI”

Kekeliruan berkaitan status pengecualian cukai institusi keagamaan susulan daripada pindaan kepada perenggan 13(1) Jadual 6 Akta Cukai Pendapatan 1967 telah diperjelas dan diselesaikan hasil pertemuan yang diadakan di antara YB Datuk Johari Abdul Ghani, Menteri Kewangan II dengan wakil-wakil daripada institusi keagamaan yang telah diadakan pada 9.1.2017 di Kementerian Kewangan, Putrajaya. Pertemuan ini telah juga dihadiri oleh pegawai-pegawai kanan Kementerian serta Datuk Sabin Samitah selaku Ketua Pegawai Eksekutif, Lembaga Hasil Dalam Negeri Malaysia.

YB Menteri pada sesi pertemuan tersebut telah menghuraikan hasrat kerajaan terhadap pindaan undang-undang yang telah dibentang dan diluluskan di Parlimen pada sesi yang lepas. Pindaan tersebut pada prinsipnya tidak bertujuan untuk menarik balik status pengecualian cukai yang telah dinikmati oleh institusi keagamaan. Sehubungan dengan itu, bagi memperjelaskan status terkini institusi keagamaan selepas pindaan tersebut berkuatkuasa, YB Menteri bersetuju untuk mengeluarkan suatu perintah pengecualian di bawah seksyen 127 Akta Cukai Pendapatan 1967 bagi mengecualikan semua jenis pendapatan institusi keagamaan yang berdaftar di bawah Jabatan Pendaftaran Pertubuhan Malaysia atau di bawah mana-mana undang-undang bertulis yang mengawal selia institusi tersebut.

Prasyarat pendaftaran untuk mendapatkan pengecualian adalah selaras dengan hasrat kerajaan supaya institusi keagamaan sentiasa dikawal selia dengan baik dan tidak disalahgunakan oleh pihak-pihak yang tidak bertanggungjawab. Keputusan YB Menteri telah disampaikan kepada wakil-wakil institusi keagamaan yang hadir di dalam pertemuan tersebut. Perintah pengecualian yang dimaksudkan akan dikeluarkan dalam masa yang terdekat.

**YB Datuk Johari Abdul Ghani**  
**Menteri Kewangan II**

10 Januari 2017

 Muat Turun PDF (</pdf/ucapan/2016/institusiagama.pdf>)